

Evening Dogri News

20 Oct. 2025

18:15 Hrs

Headlines

1. प्रधानमंत्री नरेन्द्र मोदी होरें INS विक्रांत पर मनाई देयाली, 1. . आपरेशन सिंदूर दी सफलता लेई हथियारबंद बलें दी सराहना कीती।
2. रोशनी दा त्योहार देयाली अज्ज समूलचे देसै च धार्मिक श्रद्धा ते जोश, जज्बे कन्नै मनाई जा करदी ऐ।
3. प्रधानमंत्री नरेन्द्र मोदी होरें देशवासियें गी स्वदेशी चीजां-बस्तां खरीदियै त्योहार मनाने दी अपील कीती।
4. सेना प्रमुख जनरल उपेन्द्र द्विवेदी होरें सुरक्षा चुनौतियें बश्कार तयारियें दी तस्दीक कीती।
5. भारत नै वियतनाम च एशियाई किश्ती चालन मकाबले च 3 सुन्ने दे तगमे सनें कुल 10 तगमे अपने नां कीते।

<><><><><><>

PM Sindhoor

प्रधानमंत्री नरेन्द्र मोदी होरें आखेया जे त्रौनें रक्षा सेवा बश्कार बेजोड़ तालमेल नै आपरेशन सिंदूर दौरान पाकिस्तान गी गोडे टेकने पर मजूबर करी दिता। प्रधानमंत्री होरें ए गल्ल गोवा ते कारवार समुन्द्री कंडे पर तैनात INS विक्रांत पर नौ सैनिकें कन्नै देयाली मनांदे होई आक्खी। श्री मोदी होरें आखेया जे INS विक्रांत आत्मनिर्भर भारत ते मेड इन इंडिया दा सशक्त प्रतीक ऐ। प्रधानमंत्री होरें आखेया जे सरकार नै हर जोखिम गी सुधार च, हर सुधार गी लचीलेपन ते हर लचीलेपन गी क्रांति च तब्दील करने दा कम्म कीता ऐ। ध्यानजोग ऐ जे 7 मई गी भारतीय फौज नै 22 अप्रैल गी जम्मू-कश्मीर दे पहलगाम च कीते गेदे आतंकी हमले दे परते च आपरेशन सिंदूर रम्भ कीता हा ते पाकिस्तान दे कब्जे आहले जम्मू-कश्मीर ते पाकिस्तान च नेकें आतंकवादी ढांचे गी अपना नशाना बनाया हा।

<><><><><><>

Diwali

देयाली दा त्योहार अज्ज समूलचे देसै च धार्मिक शरदा ते जोश-ज्जबे कन्नै मनाया जा करदा ऐ। ए त्योहार बुराई पर अच्छाई दी जित्त दा प्रतीक ऐ। त्योहार घरे, मंदरें, दकानें-हट्टियें ते होर दुइयें थाहरें पर रोशनी करियै मनाया जंदा ऐ। इस ध्याड़े लोक टकोहदें तौरा पर माता लक्ष्मी दी पूजा करदे न। राष्ट्रपति द्रौपदी मुरमू, उपराष्ट्रपति सी.पी. राधा कृष्णन ते प्रधानमंत्री नरेन्द्र मोदी होरें देयाली दे मौके पर लोकें गी शुभकामनां दितियां न। मुखमंत्री उमर अब्दुल्ला होरें बी जम्मू-कश्मीर दे लोकें गी ते देस-विदेश च देयाली मनाने आहलें गी दिली मबारकबाद दिती ऐ। अपने सनेह च मुखमंत्री होरें आखेया जे रोशनी दा त्योहार देयाली बुराई पर अच्छाई दी जित्त ते सच ते धर्म दी जित्त दा प्रतीक ऐ। उनें गलाया जे ए त्योहार आसें-मेदें ते हिरख-प्रेम दा त्योहार ऐ जेड़ा दया, एकता ते आपसी सम्मान दे मुल्लें दा प्रतीक ऐ। ए भारत दी बन-सबन्नी सांस्कृतिक विरासत गी सगोसार करदा ऐ।

<><><><><><>

PM Buying

प्रधानमंत्री नरेन्द्र मोदी होरें सब्बनें नागरिकें अगै आहवान कीता ऐ जे ओ त्योहारें दी इस ऋतु दौरान देसै च बनी दियें चीजें-बस्तें दी खरीददारी करन ते 140 करोड़ भारतीय दी मेहनत दा मान करन। श्री मोदी होरें नागरिकें गी त्योहारें पर खरीदी गेदियें स्वदेशी चीजें गी सोशल मीडिया पर सांझा करने दी बी अपील कीती तां जे होर दुए लोक बी इनेंगी खरीदने लेई प्रेरित होई सकन। My Gov India पर इक्क सनेह राएं श्री मोदी होरें लोकें गी आखेया जे ओ भारत च बनी दियें चीजें-बस्तें गी खरीदन ते मान कन्नै ग्लान ए स्वदेशी ऐ।

<><><><><><>

Diwali Muslim

रियासी जिले दे कटरा इलाके च रौहने आहले मुसलमान परोआर साम्प्रदायिक एकता दी मिसाल पेश करा रदे न, जेहेड़े पिच्छले 35-40 बरे थमां फुल्लें दी राई-बाई करदे न ते फुल्लें दी मालां बनाइयै बेचदे न। तकरीबन 35-40 नेह परोआर न जेहेड़े किट्टे रलियै मेहनत करदे न ते देयाली दे मौके पर फुल्लें दी मालां बनांदे न। एह परोआर सब्बनें त्योहारें पर उधमपुर जिले ते ओहदे आगे-दलागे दे इलाकें च जाइयै अपनी मालाएं गी बेचदे न। ज्यादातर एह मंदरें कश ते उधमपुर दी गोल मार्केट च बोहन्दे न तांजे दर्शन करन औने आहले शरदालुएं गी फुल्लें दी माला

खरीदने च कोई औख नेंई आवै। इस देयाली पर उनें बड़ी मती मेहनत ते सच्ची लगन कन्नै मालां त्यार कीतियां न। मालां त्यार करने आहले लोक अपने हिंदू भ्राएं दी आस्था दा बड़ा सम्मान करदे न ते उनेंगी अपने फुल्ल, हार बेचियै बड़ी मती खुशी मसूसदे न। हिंदी भ्राएं गी बी बड़ी मती खुशी होंदी जिसलै इंदा कारोबार तेजिया कन्नै बदधा ऐ। मकामी लोक बी उनेंगी दुए समुदाय दी भावनाएं बक्खी इन्ना सम्मान रखदा दिक्खियै बड़े मते खुश न। इयै नेंई मसाल एह दस्सदी ऐ जे भारत च रौहने आहले लोक एकता गी पैहली थाहर दिंदे न।

<><><><><><>

Railway Diwali

रेल मंत्री अश्विनी वैष्णव होरें अज्ज नमीं दिल्ली च रेलवे बोर्ड दे वार Room दा दौरा लाया। इस दौरे दौरान श्री वैष्णव होरें त्योहारें दी ऋतै च यात्रुएं दी आओ-जाई दा जायजा लैता। मंत्री होरें 24 घंटें कम्म करने आहले कर्मचारियें गी शाबाशी दिंदे होई नां छड़ा उन्दा बल बदाया सगुआं उनेंगी देयाली दी मबारकबाद बी दिती।

<><><><><><>

Army Chief

सेना प्रमुख जनरल उपेन्द्र द्विवेदी होरें सुरक्षा चुनौतियें दा मकाबला करने लेई फौज दियें त्यारियें दी तस्दीक करदे होई अपने शा पहलै सेवा दे सिद्धांत दा आह्वान कीता ऐ। श्री द्विवेदी होरें सामरिक तौरा पर महत्वै आहले इलाकें च फौजियें दा उत्साह बदाने दे मकसद कन्नै मध्य क्षेत्र दियें अगेत्री चौकियें दा बी दौरा लाया। सेना प्रमुख होरें साबका फौजियें ते मकामी लोकें कन्नै गल्लकत्थ कीती ते उन्दे परोआर आहले गी देयाली दी मबारकबाद दिती। श्री द्विवेदी होरें पितौरागढ़ ते ओदे आहले-दोआले दियें अगेत्री चौकियें दे ऊंचाई आहले इलाकें दियें चौकियें दा बी दौरा लाया।

<><><><><><>

LG Loard Buddha

उपराज्यपाल मनोज सिन्हा रुस दे कलमीकिया गणराज्य दी अपनी त्रै-रोजा यात्रा करियै अज्ज दिल्ली परतोई आए न। श्री मनोज सिन्हा रुस दे कलमीकिया गणराज्य दी राजधानी एलिस्टा च भगवान बुद्ध दे पवित्र अवशेषें गी भारत च वापस आहनने लेई इक प्रतिनिधिमंडल दी अगुआई करा रदे हे। सोशल मीडिया मंच एक्स उप्पर इक पोस्ट च उपराज्यपाल होरें आखेया ऐ पवित्र अवशेष रुस दे कलमीकिया च इक हफ्ते तगर चली दी प्रदर्शनी दे मगरा घर वापस आई गे न। इस प्रदर्शनी नै आपसी समझदारी गी बढ़ावा देने, भरोसे ते सहयोग गी पैदा करने ते अध्यात्मिक अनुभवें दे राहें मकामी सरबंध बनाने दी साढ़ी प्रतिबद्धता गी दोहराया ऐ।

<><><><><><>

GST Real Estate

प्रधानमंत्री नरेन्द्र मोदी हुंदे आस्सेया पिच्छले महीने दी 22 तरीक थमां रम्भ कीते गेदा जी.एस.टी. बचत उत्सव च समाज दे सभ्भनं वर्गे गी लाह पुजा करदा ऐ। अज्ज अस तुसेंगी दस्सा करनेआं ऐ जे रियल एस्टेट क्षेत्र गी मजबूत बनाने च जी.एस.टी. सुधार किस चाल्ली मदाद करा करदे न। अगली पीढ़ी दे जी.एस.टी. सुधारें लोडचदी सामग्री गी मत्ता किफायती बनाइयै समूलची लागत गी घट्ट करी दिता ऐ, जेदे कन्नै रियल एस्टेट क्षेत्र गी बढ़ावा थोआ ऐ। सीमेंट पर लग्गने आहली टैक्स दी दर 28 प्रतिशत थमां घटाइयै 18 प्रतिशत करी दिती गेई ऐ, जेदे कन्नै देस भर च घरें ते बुनियादी ढांचा परियोजना दे निर्माण दी लागत घट्ट होई गेई ऐ। एदे इलावा संगमरमर ते ग्रेनाइट ब्लॉकें पर बी जी.एस.टी 12 प्रतिशत थमां घटाइयै 15 प्रतिशत कीती गेई ऐ, जेदे कन्नै फर्श ते फिनिशिंग कम्में पर खर्च च कमी आई ऐ। इससै चाली इट्टे, रेत, चूने दियें इट्टें सरबंधी कम्म पर हून पहले दे 12 फीसद टैक्स दे मकाबले 5 फीसदी दी घट्ट दर लागू हुंदी ऐ। कुल रलाइयै इंदे कन्नै लौहके पैमाने पर निर्माण गतिविधियां मती किफायती होई गेइयां न।

<><><><><><>

RDD Comm

ग्रामीण विकास मैहकमे दे कमीशनर सैक्रेटरी मोहम्मद ऐजाज़ असद होरें अज्ज राजौरी जिले दे प्लांगर ब्लॉक च ब्लॉक विकास परिषद दफ्तर दी नमीं ईमारत दा उदघाटन कीता। इस ईमारत च लाईब्रेरी ते कम्प्यूटर लैब जनेई सहूलतां उपलब्ध न। उदघाटन समारोह च बोलदे होई

आयुक्त सचिव होरें ग्रामीण ईलाकें च प्रशासनिक बुनियादी ढांचे च सुधार लेई सरकारै दी वचनबद्धता पर जोर पाया। उनें गलाया जे इस नमीं सहूलत कनै सार्वजनिक सेवा बंड सरिस्ते च होर सुधार औग ते इलाके दे लोकें लेई साजगार वातावरण तयार करने च मदाद हासल होग।

<><><><><><>

Asian Rowing

भारत नै वियतनाम दे हाई फोंग च एथियाई किशती चालन मकाबले च शानदार प्रदर्शन करदे होई 3 सुन्ने दे 5 चांदी दे ते कै दे 2 तमगे सने कुल 10 तगमे अपने नां कीते। भारतीय टीम नै मर्दे दी Light Weight Double Scull, Quadruple Scull ते मर्दे दी Single Scull च सुन्ने दे तगमे जिते। भारतीय महिला खडारियें दी Light Weight जोड़ी Men's eight Men's Double Scull मकाबले च चांदी दे ते मर्दे दी Light Weight Double टीम ते महिला दी Eight टीम नै कै दे तगमे जिते।

<><><><><><>